



Број/Број: **03/1-50-1-7-52/09**
Сарајево/Sarajevo, 24.5.2010.

**ČLANOVIMA ZAJEDNIČKE KOMISIJE ZA ODBRANU I SIGURNOST
PARLAMENTARNE SKUPŠTINE BOSNE I HERCEGOVINE**

Z A P I S N I K

**52. sjednice Zajedničke komisije za odbranu i sigurnost BiH
Parlamentarne skupštine BiH,
održane 24.5.2010., od 10 do 12,30 sati**

Sjednici su prisustvovali sljedeći članovi Zajedničke komisije: Branko Zrno, Šefik Džaferović, Slobodan Šaraba, Ivo Miro Jović, Vinko Zorić, Hazim Rančić i Adem Huskić.

Sjednici nisu prisustvovali: Mirko Okolić, Selim Bešliagić, Dušanka Majkić, Drago Kalabić i Sulejman Tihić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Selmo Cikotić, ministar odbrane BiH,
- Živko Marjanac, zamjenik ministra odbrane BiH,
- Miladin Miložčić, načelnik Zajedničkog štaba OSBiH,
- Boško Šiljegović, parlamentarni vojni povjerenik BiH,
- Senahid Godinjak, Ministarstvo odbrane BiH,
- Mladen Kanlić, Ministarstvo sigurnosti BiH,
- Senad Bužimkić i Dragiša Mekić, Ministarstvo vanjske trgovine i ekonomskih odnosa BiH,
- Amel Fako, Ambasada SAD-a u BiH,
- Jelena Despot, OHR,
- Jasna Dragičević, Misija OSCE-a u BiH,
- Lejla Hadžihasanović, Štab NATO-a Sarajevo,
- Aida Salčinović, TVFBiH,
- Željka Domazet, „Glas Srpske“,
- Snežana Samardžija, „SRNA“,
- Almir Terzić, „Oslobođenje“,
- Branka Kuslija, RTRS,
- Goran Špirić i Zoran Brkić, PSBiH,

- Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH.

Kako nije bilo rasprave o predloženom dnevnom redu, zaključeno je da 52. sjednica Zajedničke komisije za odbranu i sigurnost BiH ima sljedeći

DNEVNI RED

1. Usvajanje Zapisnika 51. sjednice Zajedničke komisije;
2. Razmatranje Prijedloga zakona o izmjenama i dopunama Zakona o službi u Oružanim snagama BiH, druga komisijska faza (predlagač: poslanik Niko Lozančić);
3. Zahtjev za ponovnim razmatranjem Informacije o učešću pripadnika OSBiH na sahrani Rasima Delića;
4. Informacija o stanju sigurnosti u BiH u 2009. godini (podnosilac: Ministarstvo sigurnosti BiH);
5. Tekuća pitanja:
 - a. Poziv na „Treći strateški vojno-politički seminar“, Sarajevo, od 16. do 18.6.2010.
 - b. Posjeta predstavnika PSOTC-a Parlamentarnoj skupštini BiH, 21.6.2010.

Ad. 1. Usvajanje Zapisnika 51. sjednice Zajedničke komisije

Članovi Komisije su bez rasprave, jednoglasno, sa sedam glasova „za“, usvojili Zapisnik 51. sjednice Zajedničke komisije za odbranu i sigurnost BiH.

Ad. 2. Razmatranje Prijedloga zakona o izmjenama i dopunama Zakona o službi u Oružanim snagama BiH - druga komisijska faza (predlagač: poslanik Niko Lozančić)

Branko Zrno pojasnio je da je riječ o Prijedlogu zakona u drugom čitanju, te da se Komisija treba izjasniti o Zakonu u cjelini. Naveo je da do roka utvrđenog Poslovnikom na Prijedlog ovog zakona nisu ulagani amandmani, te konstatirao da predlagač Zakona ne prisustvuje ovoj sjednici Komisije. Zatim je otvorio raspravu.

Šefik Džaferović rekao je da je prvobitno želio amandmanski djelovati na ovaj zakon, ali je procijenio da to nije moguće, s obzirom da se radilo o izuzetno velikom broju amandmana. Stoga je Klub poslanika SDA, 21.5.2010., u parlamentarnu proceduru uputio Prijedlog zakona o dopunama Zakona o službi u OSBiH, sa zahtjevom da se razmatra po skraćenom postupku, u skladu s članom 126. Poslovnika Predstavničkog doma. Naveo je da se Prijedlogom zakona koji je predložio Niko Lozančić zadire u dubinu same reforme odbrane jer se izjednačava status vojnika koji se nalaze u profesionalnom i rezervnom sastavu, te

određuje da svi koji navrše 45 godina starosti idu u penziju, što odstupa od sadašnjih zakonskih rješenja kojima je predviđeno da vojnik može biti u službi 15 godina, odnosno do napunjenih 35 godina starosti. Naveo je i da je na ovaj prijedlog zakona stiglo negativno mišljenje od Vijeća ministara BiH, kao i da se Štab NATO-a u BiH o njemu izjasnio negativno. Prijedlog zakona koji je u proceduru uputio Klub SDA, također, ide u pravcu zaštite vojnika koji su bili najmanje dvije godine učesnici rata, ne opterećujući pri tome u potpunosti entitetske penzijske fondove, već predlažući kao rješenje subvencioniranje postojeće razlike, za koju se procjenjuje da ne bi bila velika, od države BiH i njenog budžeta. Zaključio je da Prijedlog zakona koji je predložio Klub SDA ne zadire u reformu odbrane i da će se na sutrašnjoj sjednici Predstavnički dom izjasniti o prijedlogu za skraćenu proceduru, te u skladu sa svim navedenim istaknuo da on neće podržati u drugom čitanju Prijedlog zakona Nike Lozančića.

Branko Zrno zamolio je članove Komisije da diskutuju prvenstveno baziraju na Prijedlogu zakona Nike Lozančića, s obzirom da je to tačka dnevnog reda.

Selmo Cikotić, ministar odbrane BiH, pojasnio je da postoji puni konsenzus unutar Ministarstva odbrane BiH i Oružanih snaga BiH kada je u pitanju prijedlog ovog zakona. Ukratko je podsjetio članove Komisije na hronologiju dešavanja koja se tiču tranzicije personala, te na činjenicu da su o svim koracima u vezi s ovom tranzicijom redovno informirani Zajednička komisija za odbranu i sigurnost BiH, Vijeće ministara BiH i Predsjedništvo BiH, te da su sve ove institucije ovom procesu davale bezrezervnu podršku. Kratko se osvrnuo i na to koliko je lica do sada otpušteno iz OSBiH, koliko je novih vojnika prošlo obuku, odnosno koliko će ih još proći tokom narednog perioda, te podsjetio na prekvalifikaciju određenih kadrova u okviru OSBiH, kojima je određeni broj personala ostao unutar OSBiH. Naglasio je da je Ministarstvo odbrane BiH prvobitno analizom zakonskog prijedloga Sefera Halilovića, a zatim i Nike Lozančića, došlo do procjene da bi usvajanje ovakvih rješenja u potpunosti urušilo koncept OSBiH, izjednačilo učesnike rata u BiH s licima koja to nisu bila, te naglasio činjenicu da sve to penzijsko-invalidski fondovi entiteta ne bi mogli finansijski podnijeti. Zaključio je da se ovakvim rješenjima razbija koncept OSBiH, urušava reforma odbrane i zaustavlja put BiH u NATO. Podsjetio je i da je Ministarstvo odbrane BiH pokrenulo niz aktivnosti kojima su izdvojena značajna sredstva u okviru NATO Trust Funda, te naveo da se u ovom trenutku u okviru ovog fonda nalaze sredstva u iznosu od oko 4,6 miliona eura, od čega su 3 miliona eura operativna za zbrinjavanje vojnika koji OSBiH napuštaju ove godine. Ovim sredstvima će vojnici koji napuštaju OSBiH ove godine biti bolje zbrinuti od vojnika koji su OSBiH napustili u ranije. Diskusiju je zaključio osvrtnom na Prijedlog zakona Kluba SDA, navodeći da bi Ministarstvo odbrane BiH moglo podržati ovo, kao i bilo koje drugo zakonsko rješenje, ako bi se njime sačuvala profesionalne OSBiH, nastavio put BiH ka NATO-u, te nastavila reforma odbrane u potpunosti.

Miladin Milojčić, načelnik Zajedničkog štaba OSBiH, naveo je da je, od 2.752 vojnika koji su planirani za otpust, status njih 1.052 riješeno po različitim osnovama. Za 270 vojnika koji u 2010. godini pune 35 godina donesena je odluka da se ugovori produže na još tri godine. Za preostalih 1.700 vojnika napravljen je plan otpusta u ovoj godini. Ako bi bio usvojen Prijedlog zakona Nike Lozančića, u sistem bi se, prije svega, trebalo vratiti prvobitno otpuštenih 295 vojnika, koji u ovom trenutku nemaju više svojih pozicija na koje se mogu

vratiti, te bi trebalo prekinuti obuku koja je počela 10. maja za 298 novih vojnika, s obzirom da se oni ne bi imali gdje rasporediti. Značajna finansijska sredstva potrošila bi se i na prekid specijalističkih pregleda za novu klasu vojnika, koji s obukom treba da počnu u augustu. U svojim pojašnjenjima naveo je i da Ministarstvo odbrane BiH treba 10. juna potpisati akt u vezi s novim Trust Fundom, koji bi obuhvatio period do 31.12.2010., a čiji bi lideri nacije bili Holandija, Norveška i Slovenija. Zaključio je da je vrlo važna poruka međunarodnih subjekata u BiH da se proces izmjena i dopuna postojećeg Zakona o službi u OSBiH treba zaustaviti, te konstatirao da bi BiH bila prepoznatljiva i kao najstarija vojska, te izrazio bojazan da kao takva neće biti u mogućnosti učestvovati u mirovnim misijama u svijetu. Podsjetio je da je u počecima procesa reforme odbrane u BiH navedeno da će zemlja na ovom putu proći kroz mnoge bolne odluke, te ocijenio da će put od prijema BiH u MAP do punopravnog članstva unutar NATO-a biti još teži.

Slobodan Šaraba procijenio je da Prijedlog zakona Nike Lozančića treba prihvatiti, naglašavajući da se trebalo ranije voditi računa o svim segmentima koje su u svojim diskusijama naveli čelni ljudi Ministarstva odbrane BiH i Zajedničkog štaba OSBiH. Saglasio se s činjenicom da jedan broj mladih ljudi unutar OSBiH očekuje zaposlenje, ali i podsjetio da treba voditi računa o ljudima koji ovim procesom ostaju bez posla. Lozančićevo rješenje predstavlja odraz jedne realnosti i ono nudi ovoj populaciji pristojan život.

Ivo Miro Jović procijenio je da se ovim prijedlogom zakona želi dati podrška ljudima koji su bili žrtve posljednjih ratnih dešavanja u BiH. Procijenio je da se odnos državnih institucija prema ovoj kategoriji ljudi promijenio tek nakon što je nedavno došlo do protesta vojnika. Zaključio je da su posljednjih godina davane povlastice ovoj kategoriji lica, kako bi oni bili angažirani do 40 i neke godine života, te istaknuo da su time ti ljudi bespotrebno zavlaceni.

Branko Zrno je zatim zaključio raspravu i dao na izjašnjavanje Prijedlog zakona u cjelini.

Odlučivanje u drugoj komisijskoj fazi

Članovi Zajedničke komisije, s četiri glasa „za“, tri glasa „protiv“, bez „suzdržanih“ glasova, uz dovoljnu prostu većinu, ali bez postojanja glasa „za“ iz bošnjačkog naroda, nisu podržali Prijedlog zakona o izmjenama i dopunama Zakona o službi u Oružanim snagama BiH.

Kao razlog odbijanja navedeno je da Prijedlog zakona direktno ugrožava postojeća zakonska rješenja predviđena Zakonom o odbrani i Zakonom o službi u Oružanim snagama BiH, a time i proces reforme odbrane u BiH u cijelosti.

Ad. 3. Zahtjev za ponovnim razmatranjem Informacije o učešću pripadnika OSBiH na sahrani Rasima Delića

Slobodan Šaraba je, kao podnosilac zahtjeva za razmatranjem ove tačke dnevnog reda, podsjetio da je Komisija na svojoj prošloj sjednici došla do saznanja da o dešavanjima u vezi sa sahranom Rasima Delića uopće nisu bili upoznati zamjenici ministra odbrane BiH, te da su

predstavnicima srpskog naroda iz Zajedničke komisije za odbranu i sigurnost BiH odlučili obnoviti svoj zahtjev za ponovnim razmatranjem ove informacije i na raspravu pozvati ministra odbrane BiH, oba njegova zamjenika, kao i načelnika Zajedničkog štaba OSBiH. U daljnjem obrazloženju naveo je da je istina da Rasim Delić nije bio optužen pravosnažno, ali da je dovoljna bila i sama činjenica da je osuđen u Hagu, što je srpskim članovima Komisije dalo za pravo da zatraže ovu informaciju. Njegovo mišljenje je da je odluka ministra odbrane u vezi s ovom sahranom donesena samoinicijativno, navodeći da se nije trebala desiti upotreba počasne jedinice OSBiH na sahrani, kao ni da se na onakav način nije smjela upotrijebiti ni sala Doma OSBiH u Sarajevu. Informaciju koju je dostavilo Ministarstvo odbrane BiH ocijenio je krajnje licemjernom, cijeneći da je učinjen prekršaj, te je stoga zatražio odgovor na pitanje zbog čega je sve ovo urađeno na ovakav način.

Šefik Džaferović podsjetio je da je još na prošloj sjednici on podržao Informaciju koju je podnio ministar odbrane BiH, a koja je predmet razmatranja i na ovoj sjednici. Naglasio je da Rasima Delića nije pravosnažno osudio Haški tribunal, te naveo da mu je izrečena nepravosnažna presuda. Podsjetio je da je Delić u potpunosti saradivao s Haškim tribunalom, te zaključio da njegov slučaj nije bilo potrebe politizirati, s obzirom da je saradnja s Haškim tribunalom obaveza svih građana BiH i ona je kao takva unesena i u Ustav BiH.

Selmo Cikotić, ministar odbrane BiH, zahvalio se svim članovima Zajedničke komisije na otvorenoj raspravi i naveo da će i ubuduće biti prisutan svim sjednicama Komisije na kojima se budu tražili odgovori od njega na slična pitanja. Naveo je da je na dan smrti Rasima Delića bio službeno odsutan iz BiH, te je upoznao članove Komisije da je formiran Odbor za sahranu, koji je razmatrao pravnu mogućnost angažiranja puka OSBiH za tu potrebu. Naveo je da je tokom svog odsustva bio u kontaktu s ljudima iz ovog organizacionog odbora, te naglasio da je ovaj odbor procijenio potpuno legalnim zahtjev za angažiranjem puka za sahranu i jednoglasno donio odluku o njegovom angažiranju za ovu potrebu, s obzirom da general Delić nije pravosnažno osuđen, da je postupak u toku te da je zahtjev porodice generala Delića i Udruženja generala Armije BiH za organizaciju sahrane s počastima legitiman i opravdan. Naveo je da ga je general Rizvo Pleh upoznao o stanju u vezi s organizacijom sahrane noć prije sahrane, po njegovom dolasku u Sarajevo, kao i o mišljenju generala Milojčića i Puljića koji su generala Pleha upozorili na zakonska rješenja o upotrebi jedinica OSBiH u takvim prilikama. Naveo je i da nije bio fizički u mogućnosti razgovarati sa svojim zamjenicima, s obzirom da su bili na službenom putu van BiH. Ocijenio je da je sve urađeno u okviru postojećih zakonskih propisa, s obzirom da je komemoracija organizirana u Domu OSBiH, te angažirana jedinica OSBiH ranga voda, a iz ceremonije su isključeni generali i oficiri OSBiH. Zaključio je da je njegov stav prema optuženim licima jasan i da ne bi mogao donijeti drugačiju odluku, navodeći da je očito da je i sadašnja pravna regulativa, kojom je definirano angažiranje ovih pukova, u jednom dijelu nedorečena i da ju je prema tome potrebno doraditi kako se ubuduće ne bi našli u istoj ili sličnoj situaciji.

Slobodan Šaraba kratko je replicirao na diskusiju ministra odbrane BiH, navodeći da se u konkretnom slučaju radi o životnoj, a ne o pravnoj priči. Istaknuo je da je Dom OSBiH i dom generala iz RS, kao i generala iz FBiH, te da bi iz kompletnog ovog slučaja trebalo izvući zajedničku pouku. Zaključio je da je ministar u vezi s ovom svojom odlukom morao stupiti u kontakt sa zamjenicima, bez obzira gdje su se oni nalazili u tom trenutku.

Hazim Rančić naveo je da je za njega ova informacija prihvatljiva, s obzirom da se zasniva na činjenici da Rasim Delić nije pravosnažno osuđen, što je presumpcija nevinosti. Rekao je da je saglasan s konstatacijom da je potrebno izmijeniti postojeće pravilnike Ministarstva odbrane kojima se reguliraju ova pitanja kako u budućnosti ne bi došlo do spornih situacija prilikom sličnih aktivnosti.

Branko Zrno naglasio je da je ovdje riječ o vrlo osjetljivoj materiji, s obzirom da se razgovara o čovjeku koji je preminuo. Napomenuo je da su sadašnja zakonska rješenja u oblasti odbrane postignuta kompromisima i teškim usaglašavanjima svake riječi. Zaključio je da ova situacija predstavlja pouku da treba postojati dogovor o svemu, te naveo da je očito da se ministar odbrane našao u ovakvoj poziciji zbog nedostatka adekvatnih propisa i zakonskih rješenja. Stoga je istaknuo da se pravilnici moraju dograditi kako bi se ubuduće neke stvari predvidjele.

Ivo Miro Jović složio se s činjenicom da su zakonska rješenja koja definiraju oblast odbrane usaglašena s mnogo teškoća, navodeći da je riječ o reformi kojom se svi ponose. Tako su i rješenja u vezi s pukovima donesena u teškim okolnostima i sigurno je da ona nisu definirala sve elemente u potpunosti. Naglasio je da je realitet da je Haški sud prvenstveno politički tribunal kojim se vrši korekcija stanja u BiH, te zaključio da pukovi koji su formirani ne treba da budu mjerilo u odlučivanju ko je zločinac a ko oslobodilac.

Adem Huskić naveo je činjenicu da je Rasim Delić bio general i komandant Armije Republike BiH. Pravni aspekt presude je da on nije bio pravosnažno osuđen. Drugi aspekt, politički, leži u činjenici da se ovim vojska dovodi u domen politike i naglasio da se OSBiH ne smiju koristiti u političke svrhe. Zaključio je da Ministarstvo odbrane BiH i OSBiH treba da rade svoj posao nezavisno od bilo kakvih političkih uticaja i da treba izbjegavati dovodenje ovih institucija u bilo kakve političke konotacije, naročito u ovom predizbornom periodu. Saglasio se s prijedlogom da se sagledaju svi aspekti u vezi sa sadašnjom pravnom regulativom u okviru Ministarstva odbrane BiH i da se u skladu s tim predlože valjana rješenja.

Živko Marjanac, zamjenik ministra odbrane BiH, naveo je da je tokom ovih dešavanja bio van granica BiH, te da je za njih saznao od predstavnika medija prilikom povratka iz inozemstva. Istaknuo je da ne smije biti opravdavajući faktor da se nije moglo komunicirati s njim i drugom zamjenicom ministra odbrane, te naveo da je njegov zaključak da je tokom pripreme za sahranu izvršen veliki politički pritisak na gospodina Cikotića. Njegova procjena je da je ministar tražio najbezbolnije rješenje, s obzirom da je uradio samo polovinu onoga što je od njega zahtijevano. Potvrdio je da su i na njega vršeni određeni politički pritisci u određenim situacijama, u kojima je on konsultirao ministra radi pronalaska rješenja u vezi s tim pitanjima. Zaključio je da ovaj događaj treba biti svima opomena, te da treba usaglasiti regulativu kako više ne bi dolazilo do ovakvih situacija koje štete ugledu i Ministarstva odbrane BiH i OSBiH. Potrebno je prevazići ovakve situacije uz više međusobne komunikacije i informiranja.

Miladin Miložić, načelnik Zajedničkog štaba OSBiH, naveo je da je bio službeno odsutan na dan smrti Rasima Delića, te da ga je mijenjao njegov zamjenik za operacije. Potvrdio je da

ga niko nije konsultirao u vezi s pripremom sahrane i donošenja sporne odluke u vezi s njom, te zaključio da je u tom smislu narušena procedura. Iz svega navedenog očito je da se išlo ka skraćenoj proceduri, te je u skladu s tim donesena odluka koju je kreirao general Rizvo Pleh. Dan prije sahrane stupio je u kontakt s generalom Plehom, kako bi mu on objasnio situaciju iz koje je došao do saznanja da je procedura u vezi sa sahranom poodmakla. Naveo je i da je general Pleh nakon razgovora s njim i s generalom Puljićem o svemu upoznao ministra Cikotića. Usljed toga ocijenio je da na dan sahrane ne može ništa više uraditi, jer bi to sve bilo veoma štetno i za Ministarstvo odbrane BiH i za OSBiH. U svojoj diskusiji povukao je paralelu između sahrane generala Delića sa sahranom generala Talića, koji je također preminuo, a da mu nije bila pravosnažno potvrđena presuda u Hagu, i za čiju se sahranu nije bila dozvoljena upotreba počasne jedinice. Zaključio je da je ovim slučajem učinjen veliki presedan, te da je otvoreno pitanje pravilnika o pukovima, izražavajući nadu da će uskoro ovaj pravilnik biti izmijenjen, jer lica koja su osuđena u Hagu ne mogu biti dio historije pukova OSBiH.

Vinko Zorić napomenuo je da je general Delić bio vrhovni komandant Armije RBiH, ali kasnije i Vojske Federacije BiH. Zaključio je da je očito da postoje vrlo jasni problemi u vezi sa svim navedenim, te da u skladu s tim treba održati sjednicu o ovoj temi na kojoj će argumentirano biti razmotren svaki detalj. Predložio je sljedeći zaključak: Zajednička komisija za odbranu i sigurnost BiH održat će tematsku sjednicu na kojoj će se raspravljati o izmjenama i dopunama Pravilnika o pukovima OSBiH. Ministarstvo odbrane BiH obavezuje se da dostavi informaciju o stanju i problemima u toj oblasti te da predloži rješenja koja idu u duhu s vremenom i praksom koja je pokazala potrebu za promjenama i dogradnjom postojeće legislative.

Slobodan Šaraba predložio je sljedeći zaključak: Zajednička komisija za odbranu i sigurnost BiH ne prihvata Informaciju Ministarstva odbrane BiH, zbog nedorečenosti i nedostatka potpunih informacija i pokreće pitanje odgovornosti prema ministru odbrane Selmi Cikotiću za propuste koji su učinjeni tokom sahrane generala Delića.

Zajednička komisija za odbranu i sigurnost BiH jednoglasno je, sa sedam glasova „za“, usvojila zaključak koji je predložio Vinko Zorić.

Zajednička komisija, s jednim glasom „za“, tri glasa „protiv“ i tri „suzdržana“ glasa, nije usvojila zaključak koji je predložio Slobodan Šaraba.

Ovim je realizirana ova tačka dnevnog reda.

Ad. 4. Informacija o stanju sigurnosti u BiH u 2009. godini (podnosilac: Ministarstvo sigurnosti BiH)

Branko Zrno podsjetio je članove Komisije da su Informaciju dobili u materijalima te naveo da su na samoj sjednici podijeljeni novi materijali koji se odnose na ovu informaciju, a koji se odnose na nove statističke pokazatelje u vezi s njom. U skladu s tim predložio je da Komisija razmatranje ove informacije odgodi za narednu sjednicu.

Članovi Zajedničke komisije jednoglasno su, sa sedam glasova „za“, prihvatili prijedlog Branka Zrne, čime je razmatranje ove informacije i izjašnjenje o njoj odgođeno za narednu sjednicu.

Ad. 5. Tekuća pitanja

a) Poziv na „Treći strateški vojno-politički seminar“, Sarajevo, od 16. do 18.6.2010.

Željko Grubešić upoznao je članove Komisije da se, od 16. do 18.6.2010., u zgradi PSBiH, održava „Treći strateški vojno-politički seminar“, koji organizira Ministarstvo odbrane BiH u saradnji s Misijom OSCE-a u BiH, Komandno-štabnog koledža i Parlamenta Njemačke. S tim u vezi zamolio je da članovi Zajedničke komisije, u skladu sa svojim mogućnostima, prisustvuju ovom seminaru.

Zajednička komisija odlučila je da će naknadno biti određeni članovi Komisije koji će prisustvovati ovoj aktivnosti.

b) Posjeta predstavnika PSOTC-a Parlamentarnoj skupštini BiH, 21.6.2010.

Željko Grubešić naveo je da će predstavnici Centra za mirovne operacije (PSOTC) iz Butmira, 21.6.2010., posjetiti Parlamentarnu skupštinu BiH, kada će biti upoznati s radom Zajedničke komisije za odbranu i sigurnost BiH.

Zajednička komisija odlučila je da će naknadno odrediti svog člana koji će prisustvovati ovoj aktivnosti.

Sjednica je završena u 12,30 sati.

Zapisnik sačinio

Jovica Katić

Predsjedavajući

Zajedničke komisije

Branko Zrno

Dostavljeno:

- naslovu
- a/a